



BARISAN peneraju program.

PPIB UMS kolaborasi dengan PKK POLBAN dan PNJ

08.05.2019 AH

KOTA KINABALU: Pusat Penataran Ilmu dan Bahasa, Universiti Malaysia Sabah (PPIB UMS) berkolaborasi dengan Politeknik Kota Kinabalu (PKK), Politeknik Negeri Bandung (POLBAN) dan Politeknik Negeri Jakarta (PNJ) dalam anjuran program *International Collaborative Partnership: Benchmarking, Knowledge Sharing and Research Conference* selama dua hari bermula Selasa.

Empat institusi terlibat dalam memperkukuhkan kefahaman dan meneroka bidang berpotensi untuk dibangun sebagai penghargaan institusi luar negara terhadap kredibiliti UMS sebagai institusi pendidikan tinggi serta platform terbaik bagi memperkenalkan universiti itu di peringkat antarabangsa.

Seramai 13 staf akademik terlibat diketuai Dr Chiew Tung Moi selaku Timbalan Dekan Pascasiswazah dan Antarabangsa PPIB UMS.

Beberapa pengisian mewarnai program termasuk perasmian *International Research Conference of Social Science and Engineering (IRCIM) 2.0* bertempat di Ruang Teleconference POLBAN, sesi menandatangani surat niat (LoI) antara PPIB UMS dan POLBAN

disempurnakan oleh Chiew dan Dr Ir Rachmad Imang Tritjahjono selaku pengarah POLBAN, pembentangan kertas kerja perwakilan daripada institusi terlibat, slot perkongsian ilmu daripada pihak UMS dan acara kebudayaan pihak POLBAN.

Kerjasama itu memperlihatkan komitmen tinggi institusi terlibat untuk menggalak dan mengupayakan kerjasama dua hala dalam bidang berkaitan akademik dari segi Penyelidikan dan Inovasi, Penyelidikan Akademik/Peperiksaan dan Konferensi/Bengkel/Perkongsian Akademik serta Program Pertukaran Pensyarah dan Pelajar.

Sesi perkongsian ilmu oleh Timbalan Dekan Penyelidikan dan Inovasi PPIB Dr Romzi Ationg mempromosi kursus ditawarkan PPIB UMS di peringkat prasiswazah dan pascasiswazah kepada pelajar antarabangsa.

Selain mempromosi, dua konferensi bakal dilancar oleh PPIB UMS iaitu *Regional Conference on Civilisation and Ethnic Diversity 2019 (PERSEP 2019)* selama dua hari bermula 25 Oktober tahun ini serta Persidangan Antarabangsa Pengajian Kemanusiaan Ke-2 selama dua hari pada 18-19 September 2019.